

**Nunat Avannarliit Killiit Siunnersuisoqatigiiffiata kaammattuutitut aalajangersagaata Inatsisartunit ilalerneqarneranik Inatsisartut aalajangiiffigisassaattut siunnersuut: Nunat Avannarliit Killiit Siunnersuisoqatigiiffiata Savalimmiuni naalakkersuisut, Kalaallit Nunaanni Naalakkersuisut Islandimilu naalakkersuisut kaammattorpaat Nunat Avannarliit Killiit Siunnersuisoqatigiiffianut qinikkatut ilaasortat, Siunnersuisoqatigiiffimmut nalunaarutit tunngavigalugit, allatigulluunniit isumaqarfigisaminnik nunat avannarliit killiit suleqatigiinnerisut tunngasunik, nunat ilasortaasut naalakkersuisuinut apeqquteqarsinnaaleqqullugit. Apeqqutit Nunat Avannarliit Killiit Siunnersuisoqatigiiffiata allattoqarfianut nassiunneqartassapput, tassangaanniillu naalakkersuisunut pineqartunut ingerlateqqinneqarlutik. Naalakkersuisut pisussaapput ilaasortamit apeqqutigineqartumut, kingusinnerpaamik apeqquteqarfigineqartup apeqqummik tigusineraniit sapaatit akunnerini arfineq-pingasut qaangiutsinnagit, akissuteqarnissamut.**  
(Aallartitat siulittaasuat Lars-Emil Johansen)

### **Akissuteqaat**

(Inuussutissarsiornermut, Suliffeqarnermut, Niuernermit Nunanullu Allanut Naalakkersuisoq kiisalu nunat avannarliit suleqatigiinnerannut akisussaagallartoq)

Naalakkersuisut sinnerlugit periarfissaq manna atorussuppara qujassutigissallugu Inatsisartunit aalajangiiffigisassanngorlugu siunnersuutip ullumikkut oqaluuserineqartussamut oqaaseqalaarnissannut periarfissinneqarnera pillugu.

Septembarimi ukiut 30-t qaangiussimassapput, Islandimi, Savalimmiuni Kalaallit Nunaannilu inatsisartuni siulittaasut pingasuusut ataatsimoorullugu allagaqaat Nunat Avannarliit Killiit Siunnersuisooqatigiivinit tunngaviulersussaq atsioqatigiissutigimmassuk. Ilanngullugu taaneqassaq atsioqatigiinneq taanna maani Nuummi taamani pimmat.

Nunat Avannarliit Killiit Siunnersuisooqatigiivi ukiuni 30-ni atuunnermini annertunerujartuinnartumik pingaaruteqalersimavoq nunani avannarlerni nunanik qaninnernik sanilitsinnik oqaloqateqartarnitsinnut. Nunanit pingasunit taakkunannga qinikkat toqqaannartumik oqaloqatigiittarnerat, tatigeqatigiinnerup allanngutsaalinissaanut annertusarnissaanullu assut pingaaruteqarpoq, tamanna pitsaasumik sanileriit akornanni pingaaruteqarluinnarpoq. Aammattaq Siunnersuisooqatigiit naalakkersuinikkut tunngassuteqartunik isumaqatigiissuteqarnikkut allanik attavigisartakkanik suleqateqartarnej atulersissimavaa. Matumani siullertut eqqarsaatigineqarpoq 2002-mi Nunani Avannarlerni Killerni naalakkersuisut aamma Nunat Avannarliit Killiit Siunnersuisooqatigiivisa ataatsimoorlutik nalunaarutaat, kisiannili aamma Nunat Avannarliit Siunnersuisooqatigiivini suleqateqarnermik isumaqatigiissut annertuumik pingaaruteqarpoq, Siunnersuisooqatigiit naalakkersuinikkut oqaluuserisassamik sammisaqartitsinissamut ilanngussaartarnissaannut.

2002-mi ataatsimoorluni nalunaarummi allaaserineqarpoq qanoq iliorluni Nunat Avannarliit Killiit Siunnersuisooqatigiivisa aammalu naalakkersuisut akornanni ullumikkut suleqatigiinneq ingerlanneqartassanersoq. Taamaallilluni matumani naqissuserneqarpoq Nunat

Avannarliit Killiit Siunnersuisooqatigiivi naalackersuisunut pingasunut taakkununga kaammattuutunik tunniussaqaarsinnaanera, aammalu Nunat Avannarliit Killiit Siunnersuisooqatigiivisa siulittaasoqarfiata toqqaannartumik nunani pingasuni naalackersuisunut ilaasortaanik oqaloqateqaarsinnaanera.

Matumani immikkut ersarissarneqartariaqarpoq, maanna siulittaasoqarfiup aammalu nunat ilaasortat suleqatigiinnermut ministeriisa akornanni aalajangersimasumik ukiumoortumik ataatsimeeqateqartarnerput. Tamanna pisarpoq kaammattuutitut nassiunneqaarsimasunut allakkatigut akissutunik Nunat Avannarliit Killiit Siunnersuisooqatigiivinit ukiut tamaasa tunniunneqartunut malitseqartitsinertut. Matumani aamma taaneqassaaq, maanna aalajangersimasumik ileqquummat nunat pingasut taakku naalackersuisui tamatigut Nunat Avannarliit Killiit Siunnersuisooqatigiivisa ukiumoortumik ataatsimiinneranni nunap ataatsimiiffiusup suleqatigiinnermut ministerianit allat sinnerlugit peqataaffigineqartarmat.

Nunat Avannarliit Killiit Siunnersuisooqatigiivisa siunnersuummut saqqummiunneqartumut tunngavilersuutimini ersarissarpaa, Helsingforsimi isumaqatigiissutini Nunat Avannarliit Siunnersuisooqatigiivisa sulinerannut tunngavissiisumi periarfissaqarmat, nunat allat ministeriit apeqquteqaarsinnaaneq. Periarfissaq tamanna taamaalilluni aamma Nunat Avannarliit Siunnersuisooqatigiivini ilaasortanut, Savalimmiunit, Kalaallit Nunaannit Islandimillu qinikkanut atuuppoq. Matumani aamma maluginiarneqassaaq Nunat Avannarliit Siunnersuisooqatigiivini ilaasortat apeqquteqarnissamut periarfissaat nunat taakku tallimat akornanni nunat assigiinngitsut isumaqatigiissutaannut akuulluni ilaammat.

Taamaattumik Naalackersuisut tungaanniit isumaqarpugut, ileqquliussaq ineriartorsimasoq, Nunat Avannarliit Killiit Siunnersuisooqatigiivisa taassumalu ilaasortaasa aamma Naalackersuisut akornanni oqaloqatigiittarnernut, pitsaasumik eqaatsumillu oqaloqatigiittarnitsinnut tunngavissiisuusoq. Taamaattumik isumarput malillugu, Nunat Avannarliit Killiit Siunnersuisooqatigiivisa taassumalu ilaasortaasa aammalu nunat pineqartut naalackersuisuisa akornanni sulit pitsaasumik oqaloqatigiittarneq qulakkearniarlugu naalagaaffiit akornanni nutaanik isumaqatigiissusiornissamut imaluunniit allaffissornikkut periutsinik nutaanik atulersitsinissamut pisariaqartitsisoqanngilaq.